

समे – 12:25 hrs.

<><><><><><>

MKB

प्रधानमंत्री नरेंद्र मोदी होरें अज्ज करगिल दिवस दे मौके पर शहीदें गी चेता करदे होई आखेआ जे एह ध्याड़ा छड़ा अपने वीरें गी चेता गै नेई सगुआं उं'दी दलेरी दिएं गाथाएं गै नमीं पीढ़ी तगर बी पुजांदा ऐ ते इस सिलसिले च आयोजित होने आहले कार्यक्रम बी इस गल्लै दे सबूत न जे अज्ज दा भारत अपने वीर सैनिकें दी शहादत पर किन्ना मान करदा ऐ। 'मन की बात' कार्यक्रम दी 136मीं किश्त च देश-विदेश दे लोकें गी संबोधित करदे होई मोदी होरें आखेआ जे भारती सेना जल, थल ते ब्हास च बी नमिएं तकनीकें दे इस्तेमाल कन्नै अपने आपै गी मजबूत बना करदी ऐ। इन्ना गै नेई रक्षा उपकरणें दे उत्पादन ते निर्यात राएं बी भारत इस क्षेत्र च दुनिया भरै च महत्वपूर्ण थाहर बना करदा ऐ। उनें जिमी हेठ पानी दे स्तर गी उबड़ा चुक्कने लेई कैच द रेन अभियान कन्नै जुड़ने दी बी अपील कीती। प्रधानमंत्री होरें अज्जै दे कार्यक्रम च कश्मीर दे रिवायती चटाई वगू दे निर्माण दा बी चेचे तौरा पर जिक्र कीता जिसी पराली ते सरकंडे दी मदद कन्नै ग्राएं दिएं महिलाएं आसेआ तैयार कीता जंदा ऐ। उनें इस कला गी जींदा रखने च गुलाम हुसैन हुंदा बी जिक्र कीता। मोदी होेँ भारत रत्न डा. ए.पी.जे अब्दुल कलाम, जिंदी कल बरसी ऐ, गी श्रद्धांजलि भेंट करदे होई नमीं पीढ़ी गी उंदे जीवन ते आदर्श शा प्रेरणा लैने लेई बी आखेआ। मोदी होरें औंदे स्वतंत्रता दिवस गितें शुभकामनां दिंदे होई देशवासिं गी हर घर तिरंगा अभियान च बधी-चढ़ियै हिस्सा लैने दी बी अपील कीती।

<><><><><><>

Amarnath Yatra

सलाना श्री अमरनाथ जी दी जातरा 4 लक्ख दे आंकड़े गी पार करने आहली ऐ। हुनै धोड़ी तकरीबन 3 लक्ख 95 जहार श्रद्धालुएं बाबा बर्फानी हुं'दी पवितर गुफा च मत्था टेकी लैता दा ऐ। माड़े मौसमी हालात ते भारी बरखा करी किश दिनें लेई बंद रौहने मगरा श्री अमरनाथ जी दी जातरा गी कल परतियै शुरू करी दिता गेआ हा।

हुन मौसम च सुधार होने दे चलदे श्रद्धालु इक बारी फही सख्त सुरक्षा बंदोबस्तें हेठ बम बम भोले दे जयकारे लांदे जातरा मार्ग पर अगड़े बधा करदे न। तोआई जम्मू दे भगवती नगर यात्री निवास आधार शिविर थमां अज्ज बड़लै सख्त सुरक्षा बंदोबस्तें हेठ श्री अमरनाथ श्रद्धालुएं दा 19मां जत्था कश्मीर घाटी लेई रवाना होआ। अधिकारिं मूजब, अज्ज 166 गड़िं दे काफिले च जम्मू थमां बरदाए गेदे जत्थे च कुल 4 जहार 474 श्रद्धालु बालटाल आधार शिविर लेई रवाना होए दे न। इंदे च 3 जहार 531 मर्द, 785 महिलां, 10 बच्चे, 96 साधु, 51 साध्वियां ते इक ट्रांसजेंडर श्रद्धालु बी शामिल ऐ।

<><><><><><>

Kargil Vijay Diwas

अज्ज मुख्य भरै च लोक 1999 दे कारगिल युद्ध दरान अपनी जिंदू दी आहूति देने आहले भारती जवानें दी बहादुरी गी सम्मान देने लेई कारगिल विजय दिवस मना'रदे न। एह धयड़ा कारगिल युद्ध च पाकिस्तान पर भारत दी जित ते आपरेशन विजय दे कामयाबी कन्नै खतम होने दी 27मीं बरे गंड दा प्रतीक ऐ। इस अभियान दरान भारती थेआर बंद बलें जम्मू-कश्मीर दे कारगिल जिले दे उनें इलाकें गी परतिये अपने कब्जे च लेई लैता जित्थे पाकिस्तानी सैनिकें ते आतंकवादिएं अपने कब्जे च लेई लैते दे हे। तोआई, उपराज्यपाल मनोज सिन्हा होरें अज्ज कारगिल युद्ध दे बहादुर जवानें गी श्रद्धंजलि दिती। अपने स्नेह च उनें शहीदें गी सलाम कीता जिनें देसै दी सम्प्रभुता ते सम्मान दी राखी लेई सर्वोच्च बलिदान दिता। उनें आखेआ जे थेआर बंद बलें दी अविश्वसनीय दलेरी पीढ़िएं गी प्रेरित करदी रौहग।

<><><><><><>

Prog. Announcement

आकाशवाणी दे प्रादेशिक समाचर एकांश जम्मू आसेया “कारगिल विजय दिवस” दे सरबंथे च अज्ज 30एं मिन्टें दा इक विशेष कार्यक्रम प्रसारित कीता जाग- जेदा विषे होग, “नमन ते सम्मान” दपैहरी ढाई बजे प्रसारित होने आहले इस कार्यक्रम च स्टाड़े परोहने होगन- भारती सेना दे पूर्व कर्नल आर.के शर्मा- जेहड़े इस विशे पर अपने माहिराना विचार सांझे करगन।

इस कार्यक्रम दी मेजबानी साहड़ी न्यूज एंकर श्रुति खजूरिया आसेया कीती जाग।

<><><><><><>

Weather

मौसम विभाग नै 27 जुलाई यानि कल्लै धोड़ी अद्दे-दुब्बे तौरा पर बद्दल छाए दे रौहने ते प्रदेश दिए टामीं-टामीं थाहें पर हल्की बरखा बरने दी पेशनगोई कीती ऐ। एह्दे परैंत 28 थमां 30 जुलाई धोड़ी परतियै बरखा बरने दे इमकान दस्से गे न। विभाग नै अगले 5एं दिनें लेई संवेदनशील थाहें पर चानचक्क हाड़ औने ते ल्हास-पस्सियां पौने दी शेंका जाहिर कीती ऐ। प्रशासन नै लोकें गी सलाह दिती ऐ जे ओह् सौहगे-सतर्क रौहन।

<><><><><><>

Highway

जम्मू-श्रीनगर राष्ट्री जरनैली शिड़क अज्ज गड़्डिएं दी आओजाई लेई परतियै बंद ऐ। कल रामबन जिले दे रामसू इलाके च गंगरू थाहर इक बड़्डी पस्सी पौने कारण गड़्डियें दी आओजाई बंद करी दिती गेई ऐ। उआं मलबा हटाइयै रस्ता साफ करने दा कम्म तुरत शुरू करी दिता गेआ हा ते अजें बी चलै करदा ऐ। लोकें गी सलाह दिती गेदी ऐ जे ओह् रस्ता पूरी चाल्ली साफ ते सुरक्षित घोशित होई जाने तगर इस शिड़कै पर सफर लेई नेई निकलन।

<><><><><><>